

其人聽傳

右出洞玄黃籙簡文經

无上秘要卷之三十二

无上秘要卷之三十三 三十四 子一

輕傳受罰品

扶桑大帝嘗以經傳太極四真人詣於西龜王母王母告大帝曰上皇之年所以為學得見寶文便位登玉清者皆密脩寶道秘靈不宜於口不形於人潛感至寂以致上真故道貴隱寂化于無形出于無聲自我受真經於九空已經累億之劫未傳三人至中皇元年未乃到北元天中經西那之國靈鏡人鳥之山蒼萊之岫於靈宮之中擬九玄正一之炁結而成字後聖九玄金闕帝君來見靈文使命仙都運毫寫而盟天修行道成位登金闕高上以我輕洩天寶削我真元之號退降散靈官五百年中方得復於本真元始所以置四司五帝之官部於神兵者正以欲檢於漏洩罰於風刀如此可不慎哉後學如林無一人得仙何意皆由輕洩道文流放天真道既不降天罰潛彰進退失志獨死空山徒勞無獲痛恨可言道非勤而不告非勤而不行得見真經當密行求靈神真易感計日成仙

右出洞真八素真經

上清天皇地皇人皇大字皆大有清虛妙法洞玄寶文自無金名方諸青宮不得知聞有其文者傳非其人冒殫履穢不恭有靈違犯其禁七祖受考責充右官經山食火經一掠化生非人之道
洞玄靈寶上經大劫小劫符玉訣上清寶文玄洞之道自無玉骨玄圖紫字綠名不得見聞有其文者而不崇奉穢慢真文輕露宣洩流放非真有犯其禁七祖充責考屬右官罰以刀山火鄉之難三塗五苦三掠得過生非人之道
高上大洞真經三十九章素靈大有妙經唯一玉檢五老寶經金華洞房紫書上文龜山元籙白簡金根上清太霄琅書瓊文帝章上官寶篇凡三十一卷此獨立之訣乃高上玄映之道洞天玉清寶文極於已成真人有金官玉藏名書帝簡籙札紫庭得受此經不恭科怠慢不信天真輕洩聖文使世見聞為玉童所奏七祖父母被考

右出洞真四極明科

紫書丹字月窟隱文妄說以告三人死沒鬼官不得成仙

右出洞真黃炁陽精經

太上曰洩漏天文隱書已告天帝誅其三祖

又下三官絕其身命生被水火死為下鬼

右出洞真太上八素真經

高聖君曰受七聖玄紀迴天九霄白簡青錄之文師授不盟輕洩寶文弟子受而無信竊披玉篇同被風刀之考七祖充責三塗五苦萬劫不原五帝神兵恒糾漏洩明慎奉行

右出洞真七聖元紀經

受曲素訣辭之法不交人物求感冥應必可授者乃得傳之傳非其人妄洩寶經則七祖父母受冥拷於地獄

右出洞真曲素訣辭經

夫有宿命應見此文者必有神仙定錄也玉帝寶秘不傳於世妄說之者則九天刺姦奏於帝君言之罪太上使五帝神兵罰子之身七祖父母受考水官

右出洞真青要紫書經

自無玄名於丹臺綠字於玉清不得而輕傳自非神挺異骨登玄嶽而告盟列金書以誓靈此文不可得而授其音不可得而聞輕洩七祖充責已身殞喪負考三塗

右出洞真玉珮隱元洞飛內文經

太上道君曰夫有宿命應得見此文者皆玄挺開會必有神仙定分此之神經不傳於世又妄說之者則三天刺姦上聞帝君告子之罪以為宣漏之愆

右出洞真黃素四十四方經

傳之違科負盟三祖考于水官已無仙冀死為下鬼

右出洞真藏景錄形神經

合真之人當得此文得者寶秘勿妄輕洩洩露靈篇九祖枝者充責鬼官

右出洞真太霄琅書經

傳授之法皆師及弟子相授以崇玄秘授非其人不遵法度為洩宣天寶漏慢違誓死為下鬼及七祖受風火之罪自非同契寧嘗聞

右出洞真九真中經

師不依年限而授弟子則身受風刀之考

右出洞真變化寶真上經

九赤者乃九天之炁飛玄羽章結成玉文輕洩宣露傳非其人七祖獲考身沒河源

又曰受者不關天靈侍經玉童玉女列奏高

上罰以五帝神兵輕洩者罰於九祖考滅已

身受而不盟殃延七祖身被風刀自然天經

故上元君告於五帝曰經非盟而不告受不

關而失真彼此死生之責學者宜依文而奉

焉

右出洞真九赤經符五帝內真經

輕洩寶文失盟形殘七玄之祖受考鬼官

右出洞真龍景九文赤書經

傳非其人身入風火七祖父母長考于水官

右出洞真金虎真符

傳非其人為北帝所奏殃延七祖長充鬼責

身殺形殘

右出洞真高上玉清刻名內文

身殺形殘